

**UPA12 nallertinnagu Naalackersuisoqarfiit suleqatigiillutik inuussutissarsiornermut inatsit siunertaanngitsumik isertortumik akunnermiliuttoqarsinnaanngortitsilluni (stråmandsvirksomhed) Kalaallit Nunaanniit aningaasanik annissuinissaq siunertaralugu nalorninarsinnaasumillu aningaasannanniarluni ingerlatseqatigiiffiit matussuseeqatigiittarnerat atorlugu periarfissiinersoq misissoqqullugu, tassunga ilanngullugu piginneqatigiissutinik tuniniaaneq atornagu aningaasaatillilu aningaasanik attartorfigalugit aningaasaliineq atorneqarnersoq pillugu Naalackersuisut inuussutissarsiummik ingerlataqarneq pillugu inatsisartut inatsisaanni allanngortitsinissaq siunertaralugu suliaqaqqullugit peqquneqarnissaannik Inatsisartut aalajangiiffigisassaattut siunnersuut**  
(Inatsisartunut ilaasortaq, Kim Kielsen, Siumut)

### **Akissuteqaat**

(Naalackersuisut siulittaasuat)

### **Aappassaanneerinnineq**

Aallarniutigalugu Inuussutissarsiornermut Ataatsimiititaliaq sukumiisumik isumaliutissiissuteqarneranut qutsavigissavara.

Naalackersuisut maluginiarpaat Inuussutissarsiornermut Ataatsimiititaliami amerlanerussuteqartut siunnersuutip itigartinneqarnissaa inassutigigaat, Naalackersuisut inuussutissarsiorneq pillugu Inatsisartut inatsisaata iluarsaanneqarnissaa aallartereersimammasuk aammalu tamanna pillugu Inatsisartut inatsisissaannut siunnersuummik nutaamik 2012-imi saqqummiussinissaq pilersaarutigalugu.

Peqatigisaanik Inuussutissarsiornermut Ataatsimiititaliaq isumaqarpoq, aalajangiiffigisassatut siunnersuut saqqummiunneqartoq apeqqummik pingaaruteqartumik oqallisigisassamik saqqummiisoq aammalu apeqqutit sisamat siunnersuutip matuma aappassaanneernejarnissaanut akissuteqaammini akissuteqarfigeqqullugit Inuussutissarsiornermut Aatsitassanullu Naalackersuisoq qinnuigalugu.

Naalackersuisut sinnerlugit apeqqutit sisamat taakkua naatsumik akissuteqarfigeqavakka, erseqqissaatigissallugulu apeqqutit pineqartut Inuussutissarsiornermut inatsisissamat nutaamut siunnersuutip Inatsisartuni suliarineqarneranut atatillugu sukumiisumik paasinarsisinneqarumaartut akissuteqarfigeqarumaarlutillu.

### *Apeqqut 1*

*Aalajangiiffigisassatut siunnersuummi inatsisit assigiinngitsut akornanni killissarititaasut tikinneqartarput. Ataatsimiititaliap siunnersuummik suliarinninnerani paasinarsivoq, "siunertaanngitsumik isertortumik akunnermiliuttoqarsinnaanngortitsilluni aningaasanik annissuinissamat" periarfissaasinnaasunik nakkutilliinermi kina tamatumuuna Naalackersuisutut akissussaasuunersoq ersernerluttoq. Tamanna akileraartarnermut taamaallaat tunngasutut paasineqassava imaluunniit aamma Inuussutissarsiornermut Aatsitassanullu Naalackersuisup iliuuseqarfigeqassaraa?*

## Akissut 1

Isertortumik akunnermiliuttoqartarnera Inuussutissarsiornermut Aatsitassanullu Naalakkersuisup suli suliniuteqarfissanut ilaatissavaa, aamma "isertortumik akunnermiliuttoqarsinnaaneranut" periarfissaq Inuussutissarsiornermut inatsimmit peerneqaraluarpalluunniit. Suliffeqarfiit ingerlatseqatigiiffiillu Inuussutissarsiornermut Aatsitassanullu Naalakkersuisup nalinginnaasumik naalakkersuinikkut akisussaaffeqarfianut ilaanerat tamatumunnga pissutaavoq. Tamatuma saniatigut taamatuttaaq tamanna aatsitassarsiornermut suliassaqarfimmut atatillugu nakkutigineqartussaassaaq, ikummatissiassanik misissuinermit qalluinernullu akuersissummut ilusiliani april 2008-imeersumi § 21-mi allassimalluni, suliffeqarfiit kalaallinit pigineqartut paasineqassasoq tassaasut suliffeqarfiit Kalaallit Nunaanni angerlarsimaffeqartut, inuussutissarsiornermik ingerlataqarnertik aqutigalugu Kalaallit Nunaannut piviusumik attuumassuteqartut. Aalajangersagaq tassunga assigusoq Kalaallit nunaanni aatsitassarsiorluni misissuinermit tunngatillugu (ikummatissiassat ilaanatik) atugassarititaasuni nalinginnaasuni § 13-mi allassimavoq. Naqissuserneqassaaq aatsitassanut inatsit naapertorlugu qalluinissamut akuersissutit taamaallaat aktieselskabinut Kalaallit Nunaannut nalunaarsornikunut tunniunneqarsinnaammata. Annikitsumik qalluinissanut akuersissutit inunnt Kalaallit Nunaanni najorlugu najugalinnuunnaq tunniunneqarsinnaapput.

## Apeqqu 2

*Siunertaanngitsumik isertortumik akunnermiliuttoqarsinnaanngortitsilluni aningaasanik annissuinissamut* "teknikkikkut" periarfissat pillugit inuussutissarsiorneq pillugu inatsisip nutaap suliarineqarneranut atatillugu tamatuma peerneqarnissaanik Ataatsimiititaliap kissaateqarnera Inuussutissarsiornermut Aatsitassanullu Naalakkersuisup malikkusussavaa?

## Akissut 2

Suliffeqarfittut kalaallinit pigineqartut nassuiaaserneqarnissamut "teknikkikkut" periarfissaq, isertortumik akunnermiliuttuunermi naammassineqarsinnaassanngitsoq, inuussutissarsiornermut inatsisip iluarsaateqqinneqarneranut anguniagaavoq pingaaruteqartoq. Taamaattumik Naalakkersuisut ataatsimiititaliap kissaataanut tamakkiisumik tapersiisinnaapput.

## Apeqqu 3

*Inuussutissarsiornermut Aatsitassanullu Naalakkersuisumik apersuinermit paasinarsivoq, Aatsitassanut inatsimmi aamma Inuussutissarsiorneq pillugu inatsimmi suliffeqarfik qanoq innikkut kalaallit suliffeqarfigineraat assigiinngitsunik tunngaviatigut piumasqaateqarfiusoq. Inatsisit taakkua taaneqartut akornanni tamanna qanillattorniarneqarpa taamaalilluni oqaasertaliussaq suliffeqarfik qanoq innikkut kalaallit suliffeqarfigineraat inuussutissarsiornermut inatsimmi aamma aatsitassat pillugit inatsimmi aalajangersakkat tamatumuuna assigiimmik oqaasertaqartinneqalerlutik imaluunniit ajornartorsiummut tamatumunnga periusissamik allarlunnarmik Naalakkersuisut suliaqarpat?*

## Akissut 3

Naalakkersuisut ilumoornerarsinnaavaat, iluarsaassinermit qanillattuinnissaq anguniarneqartoq, taamaalilluni Inuussutissarsiornermut inatsit aatsitassanut ikummatissanullu inatsimmi

suliffeqarfimmut kalaallinit pigineqartumut nassuiaassutaasup atuutsinngitsoornissaanut tunngavilersuutitut atorneqarsinnaassanani.

#### *Apeqqu 4*

*Aningaasaqarnermut Naalackersuisup apersorneqarnerani paasinarsivoq, Isertitanik akileraarusiisarneq pillugu inatsisip transfer pricing atorlugu, talertut takitigisumik aallaaveqarluni periuseqarnermik tunngaveqarneq il. il. pillugit inatsisip aalajangersagartai aatsitassat pillugit inatsimmi tamanna pillugu aalajangersakkaniit ersarinnerusut. Aatsitassanut inatsisip tamatumuuna aalajangersagartaanik nutarterinissaq pillugu Naalackersuisut eqqarsaasersuuteqarpat, taamaalilluni isertitanik akileraarusiisarneq pillugu inatsisip aalajangersagartaanut assingusunngortillugit?*

#### Akissut 4

Aatsitassanut ikummatissanullu inatsimmi aalajangersakkat, ilaatigut assigiinngitsunik soqutigisaqartunut tunngatillugu arlaannaannulluunniit attuumassuteqanngitsumik iliuseqartarnissaq pillugu tunngaviusumut aamma annikitsuinnarmik aningaasanngortitsisarnissamut tunngassuteqartut § 16, imm. 3-imiittut, aatsitassanut ikummatissanullu inatsit naapertorlugu piiaanissamut akuersissummik tunineqarsinnaanissamut ingerlatseqatigiiffimmut piumasaqaateqartarnermut taamaallaat tunngassuteqarpoq, aammalu Namminersoneq pillugu Isumalioqatigiissitap isumaliutissiissutaaneersuulluni.

Ingerlatseqatigiiffiit akileraarutitut akiliuteqarnissaannut, Kalaallit Nunaanni tamanna pillugu akileraartarnermut inatsisit sukkulluunniit atuuttut apeqqu taapput, taamaattumik Naalackersuisut akileraartarnermut inatsimmi atuuttumi aalajangersagaareersunik, aatsitassanut ikummatissanullu inatsimmut aalajangersakkanik ilanngussinissaq pisariaqarsorinngilaat.

Matuma siuliani allassimasunik akissuteqaateqarlutik Naalackersuisut inassutigaat siunnersuut itigartinneqassasoq.